

藏春詩集卷之四

中書叅知政事魯國文定公左山商挺孟卿類藁
中順大夫浙江處州府知府瀛海馬偉廷彥校正

七言絕句

遣懷

靜守穹廬事不侵
閑中一日抵千金
傍人自任多評論
此是寥休道者心

曉行

向曉春風暖更清
殘星和月落孤城
金烏飛上扶

桑樹先是東方一片明

中秋月

月宮丹桂影婆娑
簾捲珠樓讌素娥
縱有開元遺譜
在人間難覓紫雲歌

過界墻

地老天荒雪亦蒼
車頭軋軋轉羊腸
短衣蓬鬢沙陀路
一歲三番過界墻

有懷遂長老十一首

香火僧齋闕靜緣
黃塵道路又三年
故人不似青

山色擡起頭來在眼前

小院桃花晝掩扉
東風軟軟日遲遲
兩鄉莫恨關山隔
自是人生有別離

東園花柳照青春
野客閑陪賞翫人
望見城南山色好
却回騎馬入紅塵

掃地焚香應接餘
翠雲盤結滿穹廬
閑人不解謀生事
翻過牀頭幾冊書

雨過幽庭長綠苔
東風時為掃塵埃
無人曾見春來處
門外桃花只自開

河漢西流斗柄橫
爐烟飛動月華清
陽春不恨無人
口爭裏歌飛只自聽

山疊崔嵬水渺茫
故人萬里未相忘
飄零更惜天
邊鴈獨駕秋風不入行

孤城寒角噎南樓
黃葉關山過鴈秋
憶起潯泚相
別處一窓風雨夢西州

軒外天桃手自栽
卧看花落與花開
有人來問西
來意笑指蒼烟惹綠苔

堂上笙歌醉耳聽
牡丹香散一簾風
謝家鸚鵡金

籠裏笑殺池邊綠
繼翁

半生鞍馬逐風塵
鏡裏流年白髮新
自是功名有
歸處等閑不肯逐閑人

讀遺山詩十首

劍氣從教犯斗牛
百川橫放海難收
九天直上無
疑滯更看銀河一派流

鶴揚清唳過華亭
銀漢無聲轉玉繩
夢斷一軒明
月在令人心似玉壺冰

編排一字有高卑
就者功夫作者知
自古文章貴

辭達蘇黃意不在新奇

公論元無擅否臧過情聲聞可承當杜詩韓筆難
書字不待人言自發揚

北里笙歌勸酒杯南隣門巷冷如灰秋風萬里方
搖落叫殺孤鴻春不回

青雲高興入冥搜一字非工未肯休直到雪消冰
泮後百川春水自東流

情發聲調節作文溫柔敦厚見詩真離騷九變能
堪尚屈宋前頭更有人

兩岸桃花夾醉鄉春江渺渺月茫茫諸仙詩思難
籠罩仰羨雲霄孤鳳凰

秋風夜雨布衣單破屋猶憂天下寒不料世人多
莽鹵久教吾道屬艱難

雲霞閃爍動霓旌轟磕征鼙震地聲千里折衝歸
指畫將壇孫子獨論兵

三月

背陰花木錦成叢幽谷鶯啼上苑中李白桃紅楊
柳綠天涯無處不春風

續山谷焚香

險心萬仞晝冥冥
躁欲紛紛動五兵
誰會焚香黃魯直
出門一笑大江橫

癡坐

青春緣底忙忙去
白髮無端續續生
自笑行藏多錯料
却將癡坐學忘情

淡中

瀟瀟洒洒水雲鄉
擾擾膠膠名利場
世味覺來真爵蠟
淡中服過味如糖

夏夜

天星不見黑雲垂
一夜轟雷雨雪飛
睡起陰雲寒栗烈
夏衣猶自是冬衣

夢回

心上無塵世上仙
北軒高挂日常眠
正當午夢醒時節
竹裏棋聲到枕邊

春思

江梅零落玉枝空
草草花花上苑中
桃李不言春不管
綠情紅思滿春風

留燕

銜泥舊燕壘新巢來往如辭曲折勞蝸舍雖微足
容爾盡梁爭得幾多高

暮春

百花眼底亂飄零綠柳池塘草又生絕色海棠春
也妬况他風雨本無情

齋中

閑來長把自心平寸地人間萬事萌好惡自先欺
不得休論暗室有神明

為宋義甫言書二首

轉腕不圓焉解草立毫未正謾為真須因規矩忘
規矩才得縱橫似古人
書法晉人多得妙右軍筆陣獨縱橫鵝頭轉處無
凝滯一段風流老更成
張君筆法入神趣顛草翻藏古篆風枯樹晚鴉棲
未遍忽看雲海起群鴻

感興九首

干羽無由息戰爭讀書空有未忘情蕭然獨坐穹

廬裏安得人心自太平

人間萬事不能周
自省無虧豈有憂
聞道春風和氣裏
大家都好展眉頭

殘星落盡東方明
夜氣消沉萬事生
誰信道人心似水
無時無節不澄清

敬防暴慢禮防身
橫逆來加莫要嗔
萬物分明備於我
儻能克己自歸仁

河橫斗轉三更夜
秋月亭亭影未斜
一段光明如許大
等閑休遣亂雲遮

百年身世寄蘆花
萬事無心自破除
一炷古香清靄裏
靜來重展案頭書

善無不顯惡難藏
天網恢恢有弛張
牙齒落殘舌尚在
誰知柔弱勝剛強

元精不逐物虛盈
天地誰能踐此形
萬物凋枯歲寒後
庭前松栢只青青

周流元氣不曾停
晝夜相推有晦明
一屈一伸天地理
銀蟾西沒日東生

歸來

鞍馬生平談笑間歸來贏得鬢毛班紅塵只在南
窓外收得身心一榻閑

春曉

海棠微露濕胭脂楊柳輕風弄碧絲一片春光都
是恨佳人睡起倚樓時

秋望

白沙汀渚近漁村蘋蓼花邊鷗鷺群老鶴得秋猶
勁健九臯飛起入青雲

過田家

柳映長堤水浸沙夏初騎馬過田家鳴鳩喚住西
山雨桑葉如雲麥始花

春望

濛濛小雨浥芳塵一片花光眼底新山色隔烟無
忽有故教凝佇倚樓人

山洞桃花

山村路僻客來稀紅杏稍頭掛酒旗洞裏桃花人
不見春心春色只春知

新開牡丹

四月新來三月還一春光景鏡中看東風也逐情
濃處吹落桃花放牡丹

雨過登樓

錦里春光曉望中雨餘花潤草蒙茸青山尚在浮
烟裏樓上分明見幾峰

宮中曲

簾捲東風戶半開閑庭烟鎖綠紋苔海棠花上黃
昏月曾照金鸞幾度來

駝車行

駝頂丁當響巨鈴萬車軋軋一齊鳴當年不離沙
陀地輾斷金原鼓笛聲

送竇先生因所借陶詩為贖

養老須開十頃地求凰應長九苞兒莫還兩冊淵
明集便當今朝送別詩

小溪

小溪流水碧如油終日忘機羨白鷗兩岸桃花春
色裏可能容箇釣魚舟

憶遂通長老三首

年來癡坐百無為絕體玄微却自微此意塞鴻傳
不到黃燼青縷謾南飛

去年抵枕過三冬別後關河遠萬重桃李多花易
零落青青羨殺歲寒松

一半佳山未見分平生行止不堪云又逢明月當
三五滿眼清光似對君

為大覺中言詩四首

水平忽有驚人浪蓋是因風擊起來造語若能知
此意不須特地騁奇才

七情六義一心中言語還因感處通李杜蘇黃無
二律後生徒苦立家風

清雄騷雅因題賦古律篇章遂變生一字莫教無
下落有情還似不能情

四時迭運方成歲萬物交參更是文須信乾坤常
肅靜龍吟虎嘯自風雲

晚眺

長歌短詠流年裏遠眺登高夕照邊不見南山真
面目一川秋水淡林烟

晴望

樓頭凝眺倚晴暉
山勢長林水附堤
燕子雙雙銜
不遍鳳凰城裏落花泥

期飲

天上日廻牛女度
人間春滿鳳凰城
謫仙不飲盃
中醪閑殺花前好月明

溪上

蘆花遠映釣舟行
漁笛時聞三兩聲
一陣西風吹
雨散夕陽還在水邊明

春睡

桃李爭開眼倦開
十分春睡若嬰孩
每於濃處嗔
人喚恐礙周公入夢來

訪處士不遇二首

山水分明圖畫展
烟霞散盡洞湖開
何須更見幽
人面覽此疑從浪苑來

漁舟散去釣綸收
一片殘陽在樹頭
誰與騷人消
遠思倚樓獨自看川流

山林

鍾鼎於人殊不惡山林在我固當然東風掃靜庭
前雪芳草青青又一年

年來

本存實志閑終老却被虛名誤半生甚喜年來得
書看小齋清洒紙窓明

行中小懋

水邊下馬憇斯須從者相催急又趨自笑不如灘
上鳥飛來飛去只由渠

寄中山乾明寺主

十年朔漠走風塵今日乾明伴水雲長老周旋待
賓客僧中也有孟嘗君

寄長安友人

梧桐葉盡菊花殘賴有青松保歲寒騷客題詩滿
河朔可無一句到長安

詠海印居士幽居四首

東西院映千竿竹南北池開萬朵蓮人在丹青圖
畫上不勞雲海覓神仙

草枯不整登山屐蓮盡空閑泛水舟旋撥瓮頭新

熟酒淵明醉倒菊花秋

嚴冬無色物歸根凍柳枯荷各任真紅翠許多何
處去翁言今已屬藏春

春日鶯啼綠揚樹夏天人賞白蓮花請君試自南
頭數城市山林第一家

清明後一日過懷來

居庸春色限燕臺山杏凝寒花未開驛馬蕭蕭雲
日晚一川風雨過懷來

近詩

詩如雜劇要鋪陳遠自生疎近自新本欲出場無
好譚等閑章句笑翻人

魯連不受賞

魯連談笑却三軍玉璧冰壺不受塵一葉扁舟滄
海闊千金留與市廛人

諸葛親細務

中持大體取英豪邊幅紛紛有六曹萬里經綸談
笑了區區蜀國豈須勞

卧龍廬

風雨南陽一草廬不知容得幾江湖九層淵底驪
龍睡任有人窺頷下珠

赤壁故事

三分漢鼎勢全張未悟曹公獨渺茫赤壁風濤千
載後只教勲業屬周郎

讀洛神賦

八斗竒才筆力雄洛神一賦盡為功當時羅襪生
塵處猶有波紋起細風

附書

千里家山入寸眸碧天無際月橫鈎書成待得秋
風便一線微鴻獨倚樓

春深

新染薔薇一撲黃梨花亂舞白霓裳憑誰收拾春
風去催發酴醾滿架香

馬上七夕二首

醉眠野鳥三呼起老雨西風一掃空馬上賦詩秋
七夕碧天無際思無窮

香盤綵帳蛛絲網歲歲年年七夕同何處巧成樓

上女玉鈞簾幕捲秋風

桃花曲

紅錦濯來一片新
武陵溪上照青春
世間都唱桃花曲
誰是桃花洞裏人

桃花落

溪上天桃春已過
劉郎漸老奈花何
狂風向晚休生惡
枝上殘紅苦不多

海棠曲

翠氈紅粧色正新
精神占斷滿園春
東風莫恠長

耽睡喚得醒來更誤人

城西遊

昨朝信馬鳳城西
鞭約垂楊過小堤
春色滿園花勝錦
黃鸝只揀好枝啼

月宮謠

洞裏桃花不獨春
劉郎纔去阮郎新
廣寒宮裏姮娥住
空惜娉婷不嫁人

紅葉流

霜落巖秋錦樹空
瑣窓幽思滿西風
金河本是無

情水流出宮中一葉紅

倚樓吟

獨上高樓晚不歸碧空望斷鴈猶飛欄干十二無
凭處靜倚東軒待月輝

征西回

春回三月過西州芳草青青不斷頭多少凍溪疑
住水盡隨歸客向東流

詠關雎

佳人窈窕花難比才子溫和玉不如紅日轉西家

事緩碧紗窓下詠關雎

鴈鳩詞

春風吹起樹頭鳴叫散浮雲日色晴呼婦歸來鵲
巢裏鴈鳩元不解謀生

遠別離

霜落催寒鴻鴈稀倚樓人定怨歸遲笛聲喚起山
頭月飛上青天照別離

睡蝴蝶

芳草連山翠萬重天涯何處不春風玉蝴蝶在深

花裏想與莊周夢不同

憶友

禁漏遲遲夜未分對床清話不生塵別來幾度西
窓下風雨瀟瀟憶故人

客館

客館蕭條動客情飛螢箇箇傍窓明樓頭鼓角風
吹斷漏下銀壺第一聲

春始來

三月南州草木長落花飛絮滿池塘東君也惜天

涯客盡放春光過界墻

禪頌十首

如來妙法離文字萬語千言何處歸鹿苑祇園空
浩浩回頭四十九年非

頂圓肩袒眼中花老大維摩不出家玉鏡金針休
補綴十方世界一袈裟

鏡中影像元非我石上精神却是誰落盡桃花春
不管枝頭青子自纍纍

衲子家風不外求何須苦闢快龍舟許來大小如

來藏豎得俱低一指頭

見色明心方是暗聞聲悟道轉為遲斷頭船子無
牽纜自在滄浪東復西

驢頭馬面誰分別鷓鴣嘴魚腮孰忖量諱却舊名人
不識長沙元是謝三郎

禪榻夢回三丈日香爐烟裊一絲風東家喃喃西
家默都在如來大藏中

彌棹乍離楊柳岸策筇又過杏花村水聲禽語相
和應說盡觀音不二門

春風展葉橋頭柳鵬月開花水畔梅萬事隨緣真
省力何須心地冷如灰

朝雲暮月齋簷底春水秋山拄杖邊自任閑行與
閑坐年來忘盡祖師禪

古燕感懷

虎擲風拏感壯懷英雄遺恨化塵埃燕山依舊青
如染佇望黃金布隗臺

焚勝梅香

春風吹滅小檠缺夢斷爐香結翠幃簷外杏花橫

素月恰如梅影在西窓

薔薇

謾與東風作主人栽培花草伴閑身不辭接竹成
高架收拾薔薇一片春

洛川

洛川東去幾時歸漾漾清流照翠微日暖雪消沙
岸軟鴛鴦相對不驚飛

宿寒山寺

樓上鳴鐘報五更朦朧深殿佛燈明更無幽夢隨

寒枕聽徹松風到岸聲

溪上

溪上映人楊柳黃滿溪流水碧泱泱憑君莫向溪
南望春草春風能斷腸

素帳

山為屏帳草為茵車馬縱橫動塞塵過客遠看霜
一點豈知中有讀書人

亭帳

草色如波照碧空新開一朵玉芙蓉雄風吹斷襄

王夢高捲巫山十二峯

馬酏

青樓歌酒少年郎費盡千金笑一場玉釀飲來甘
似醴羨伊不肯使人強

聞笳

霜天月夜鴈南歸塞上誰將捲葉吹莫逐西風聲
斷續天涯遠客不勝悲

鳳

來儀之日賀清朝一返丹山信息遙倘使而今有

歸意誰能復奏九簫韶

鵬

擊水三千雲翼垂搏風九萬赴天池蓬蒿斥鷃休
相笑我志應非爾所知

鶴

朱頂烏裳白羽衣新從蓬島侶雲歸千年只合巢
松上花柳從他鶯燕飛

鴈

嗶嗶萬里徹天涯兩翅搏風送落霞秋往南來春

往北到頭何處是真家

子規

化禽原是帝王身萬里飛來逼暮春
塵路盡奔名利客苦啼歸去勸何人

鳩

但得安身不苦羅幾莖柴草便為窠
雖然我拙君休笑技巧還須費力多

鷲

兩翅翩翩金縷輕年年出谷話春晴
嬌聲引得東

君媚倚翠偎紅過一生

燕

鷓鴣家本在烏衣二社相催東復西
但得梁間舊巢在莫於簾外苦爭泥

蜂

雖成群隊鬧相將聽命成功亦有王
蜜就可為人世用尋思不枉為他忙

蝶

穿花度柳傍樓臺弄日縈風舞翅開
且得我無莊

氏夢任君飛去又飛來

獵騎

三驅長是失前禽
四合應難免上林
坐不垂堂太
驕惰國家何嘗有千金

聞鴈

已層嘹唳逐春風
又到秋來叫碧空
為問人生有
何事飄零長在此聲中

芳草

平蕪一望遠山遮
午後醒來紅日斜
莫為迢迢怨

離別小戎非是七香車

遠山

仙娥初試鏡中粧
左翠微濃右翠長
應是無人愛
平淡不須重問畫眉郎

秋月

夢回殘影來窓上
日落清光墮馬前
圓鏡可將方
鏡比照來照去已三年

東勝道中

天荒地老物消磨
贏得詩人感慨多
兩鬢黃塵秋

色裏又投東勝過黃河

讀易

人常與易不相離着意求言轉見疑動靜既萌爻
象具此情明得是著龜

學道

收心學道造精微急着工夫已是遲寬過誰如蘧
伯玉回頭四十九年非

偶得

人之有善與誰行不善休忘教誨情責備百中無

一二聰明都是不聰明

夜雨

接地陰雲晚不開故鄉歸夢到邢臺枕邊忽忽聽雷
聲起風雨攢攢一潑來

碁

碁盤十九路縱橫百着皆從一着生黑白自將心
有亂不如袖手看輸贏

寄溫子玉

聰明天賦不能求求得聰明一世愁留得三分不

曉事禪房深處咽饅頭

桃枝曲

一色桃花十里春劉郎見日尚精神東風吹入西
家去猶寄芳心憶故人

藏春詩集卷之四

藏春集卷之五

中書叅知政事魯國文定公左山商挺孟卿類蒙
中順大夫浙江處州府知府瀛海馬偉廷彥校正

樂府

木蘭花慢

到閑人閑處更何必問窮通但遣興哦詩洗心觀
易散步携筇浮雲不堪攀慕看長空澹澹沒孤鴻
今古漁樵話裏江山水墨圖中千年事業一朝空
春夢曉聞鍾得史筆標名雲臺畫像多少成功歸

來富春山下笑狂奴何事傲三公塵事休隨夜雨
扁舟好待秋風

二

既天生萬物自隨分有安排看鸞鷲雲霄驛驢道
路斥鷃蒿萊東君更相料理看春風吹處百花開
戰馬頻投北望賓鴻又自南來紫垣星月隔塵埃
千載拆中台歎麟出非時鳳歸何日草滿金臺江
山閱人多矣計古來英物總沉埋鏡裏不堪看鬢
樽前且好開懷

三

笑平生活計渺浮海一虛舟任紫塞風沙烏蠻瘴
霧郎處林丘天地幾番朝暮問夕陽無語水東流
白首王家少年夢魂正統揚州鳳城歌舞酒家樓
肯管世間愁奈糜鹿踈情烟霞痼疾難與同遊桃
花為春憔悴念劉郎雙賓也成秋舊事十年夜雨
不堪重到心頭

風流子

書帙省淹留人間事一笑不須愁紅日半窓夢隨

胡蝶碧雲千里歸驟驛留酒杯裏功名渾瑣瑣今
古兩悠悠漢代典刑蕭曹畫一晉朝人物王謝風
流冠蓋照神州春風弄絲竹勝處追遊詩興筆搖
牙管字字銀鈎遇美景良辰尋芳上苑賞心樂事
取醉南樓好在五湖烟浪誰識歸舟

永遇樂

山谷家風瀟閑情味只君能識會友論文哦詩遣
興此樂誰消得室中天地目前今古今日還明日
似南華蝶夢醒來秋雨數聲殘滴詩書有味功名
應小雲散碧空幽寂北海洪鑄南山佳氣清賞今
猶惜一天明月幾行征鴈樓上有人橫笛想醉中
八表神遊不勞鳳翼

望月婆羅門引

午眠正美覺來風雨滿紅樓捲簾情思悠悠望斷
碧波煙渚蘋蓼不勝秋但冥冥天際難識歸舟大
夫骨朽筭空把泪羅投誰辨濁溼清渭一任東流
而今不醉苦一日醒醒一日愁薄薄酒且放眉頭

二

年來懶看古今文字紙千張酒中悟得天常閑殺
堦前好月不肯照西廂任昏昏一醉石枕藤床名
途利場物與我兩相忘目斷霜天鴻鴈沙漠牛羊
一庭秋草教粉蝶黃蜂自任忙花老也尚有餘香

洞仙歌

倉陳五斗價重珠千斛陶令家貧苦無畜倦折腰
問里棄印歸來門外柳春至無言綠山明水秀清
勝宜茅屋二頃田園一生足樂琴書雅意無箇事
卧看北窓松竹忽清風吹夢破鴻荒愛滿院秋香

數叢黃菊

江城子

平生行止懶編排住蒿萊走塵埃社燕秋鴻年去
復年來看盡好花春睡穩紅與紫任他開紫微天
上列三台問英才幾沉埋滄海遺珠當着在鸞臺
與世浮沉惟酒可如有酒且開懷

二遊瓊華島

瓊華昔日賀新成與蒼生樂昇平西望長山東顧
限滄溟翠輦不來人換世天上月自虛盈樹分殘

照水邊明雨初晴氣還清醉却興亡惟有酒多情
收取晉人腮上淚千載後幾新亭

三

松蒼竹翠歲寒天鴈山前鳳城邊回首燕南一別
又三年長愛故人心似月人不見月還圓小窓寂
寂鎖凝煙一燈然一詩聯詩苦燈青孤影伴無眠
明日酒中餘思在揮醉墨洒雲牋

三真子

念我行藏有命烟水無涯嗟去鴈羨歸鴉半生人

累影一事鬢生華東山客西蜀道且還家壺中日
月洞裏烟霞春不老景長嘉功名眉上鎖富貴眼
前花三杯酒一覺睡一甌茶

玉樓春

閑雲不肯狂馳騁向晚自來棲峯頂野人無事也
關門一炷古香焚小鼎驚鳥有恨無人省飛去飛
來明月影夜闌萬籟寂中聞破牖透風微覺冷

二

翠微掩映農家住水滿玉溪花滿樹青山隨我入

門來黃鳥背人穿竹去烟霞隔斷紅塵路試問功名知此趣一壺春酒醉春風便是太平無處事

臨江山

同是天涯流落客君還先到襄城雲南關險夢猶驚曾記明月底高枕遠江聲年去年來人漸老不堪苦思功名傾開懷抱酒多情幾時同一醉揮手謝公卿

二

滿路紅塵飛不去春風弄我華顛故園桃李酒樽

前賞心逢美景此事古難全若智若癡人總笑夕陽空裊吟鞭馬頭山色翠相連不如山下客何日是歸年

三

堂上簫韶人不奏鳳凰何處飛鳴黃塵擾擾馬縱橫誰能知樂毅志不在齊城後輩謾搜前輩錯到頭義重功輕海隅四面盡蒼生東風吹綠草布谷勸春耕

四梨花

冰雪肌膚香韻細月明獨倚闌干遊絲縈惹宿烟
環東風吹不散應為護輕寒素質不宜添彩色定
知造物非慳杏花才思入凋殘玉容春寂寞休向
雨中看

五桃花

一別仙源無覓處劉郎鬢欲成絲蘭昌千樹碧參
差芳心應好在時復聞蜂兒報到洞門長閉着只
今未有開時杏花容冷没人司東家深院宇牆外
有橫枝

六海棠

十日狂風才是定滿園桃李紛紛黃蜂粉蝶莫生
嗔海棠貪睡着留得一枝春便是徐熙相對染丹
青不到天真雨餘紅色愈精神夜眠清早起應有
惜花人

小重山

詩酒休驚誤一生黃塵南北路幾功名枝頭烏鵲
夢頻驚西州月夜夜照人明枕上數寒更西風殘
漏滴兩三聲客中新感故園情音書斷天曉鴈孤

鳴

二

雲去風來雨乍晴
斷烟分遠樹夕陽明
夕陽無處鴈斜橫
山重疊山外更人行
千古短長亭別離
渾是苦奈西征
欲憑雙鯉寄幽情
東風水幾日到襄城

三

曉起清愁酒盞空
清愁緣底事別離中
登臨無地與君同
青山色山外更重重
落盡海棠紅
薔薇新

東
破萼露華濃
牡丹方信一簾風
尋幽夢曾到小園

四

前
漠北雲南路九千
舊年鞍上馬又新年
玉梅寂寞老江邊
東風軟楊柳得春先
斜月照吟鞭
可人難似月缺還圓
桃花流水杏花天
歡娛地誰闔酒樽

五

一片殘陽樹上明
百禽爭啁噪
雨初晴西風鴻鴈

落沙汀歸舟遠漁笛兩三聲烟草逐人行前山青
未了後山橫山川人物闐崢嶸黃塵路鞍馬笑平
生

江月晃重山

芳草洲前道路夕陽樓上欄干碧雲何處望歸鞍
從軍客耽樂不思還洞裏仙人種玉江邊楚客滋
蘭鴛鴦沙煖鵲鴿寒菱花鏡不奈鬢毛班

二

杜宇聲中去住蝸牛角上輸贏金甌名字儘人爭

秋鴻影湖水鏡般明楊柳烟凝露重蓮花月冷風
清萬年枝隱鵲休驚隣家笛夜夜故園情

三

太白詩成對酒仲宣賦就登樓思鄉懷古兩悠悠
黃塵路風雨鬢驚秋三島雲隨鶴馭五湖月載歸
舟青山西塞水東流功名好歡伯笑人愁

四

紅雨斜斜作陣綠雲碎碎成堆武陵溪口幾人迷
桃花流水入不流迴夏日薰風殿閣秋宵寶月樓

臺仙凡境界隔塵埃青鸞客歸去又歸來

南鄉子

南北短長亭行路無情客有情
去年來鞍上馬何成
短鬢垂垂雪幾莖
孤舍一檠燈
夜夜看書夜夜明
窗外幾竿君子竹
淒清時作西風散雨聲

二

翠袖捧離觴濟楚兒郎
窈窕娘別曲一聲雙淚落
悲涼縱不關情也斷腸
今古利名忙誰信長安道
路長昔日去家年正少
還鄉故國驚嗟兩鬢霜

三

憔悴寄西州賦得登樓懶上樓
魂夢不知關塞遠
悠悠踈兩梧桐客裏秋
往事起新愁九曲回腸不
自由見說世間離別苦
休休一夜相思白了頭

四

遊子繞天涯才離蠻烟烟塞沙
歲歲年年寒食裏
無家尚惜飄零看落花
閑客卧烟霞應笑勞生鬢
早華驚破石泉槐火夢啼鴉
掃地焚香自煮茶

五

李杜放詩豪萬丈晴虹吸海濤六義不傳風雅變
離騷金玉無言價自高春日對春醪短詠長歌慰
寂寥幽鳥落來花裏語從教彩鳳飄飄上九霄

六

季子解縱橫六印纍纍拜上卿鳳鳥不來人漸老
謀生二頃田園也易成樽酒醉淵明菊有幽香竹
有聲吹破北窓千古夢風清小鳥喧啾噪曉晴

七

夜戶喜涼颼秋入關山暑氣消勾引客情緣底物

鷓鴣落日淒清叫樹稍古寺漏長宵一點青燈照
寂寥暮雨夜深猶未住芭蕉殘葉蕭疎不奈敲

八

檀板稱歌喉唱到消魂韻轉幽便覺絲簧難比似
風流一串驪珠不斷頭惟酒可忘憂况復盧家有
莫愁醉倒不知天早晚雲收花影侵窓月滿樓

鷓鴣天

垂柳風邊拂萬絲春光照眼惜花枝鳳城好景誰
來賞忙殺悠悠世上兒歌近耳酒盈卮十分勸飲

却推辭人生休聽漁家曲一日風波十二時

二

酒酌花開對月明醒中醉了醉中醒無花無酒仍
無月愁殺耽詩杜少陵三品貴一時名衆人爭處
不須爭流行坎止何憂喜笑泣窮途阮步兵

三

花滿樽前酒滿卮不開笑口是癡兒山林鍾鼎都
休問且聽雙蛾合一詞春爛處夜晴時玉壺春雪
冷胭脂海棠影轉梧桐月吟到梨花第一枝

四

清夜哦詩對月明詩魂偏向月邊清欲成小夢還
驚破無奈洋河聒枕聲紅日曉碧天晴風沙撲面
過雞鳴灤陽川裏魚龍混四海青山拱一城

五

水滿清溪月滿樓客懷須賴酒消愁風迴玉宇三
更夜露滴金莖八月秋情脉脉思悠悠星河織女
隔牽牛乘槎欲把仙郎問也似浮生有白頭

六

柳映清溪漾玉流
火榴開罷菱荷秋
一聲漁笛烟波上
宜着蓑翁泛小舟
紅蓼岸白蘋洲
閑鷗閑鷺更優游
斜陽影裏山偏好
獨倚闌干懶下樓

七

殘月低簷挂玉鈎
東風簾幙思如秋
夢魂不被楊花攪
池面還添翠壓稠
紅叱撥翠驂騮
青山隱隱水悠悠
行人更在青山外
不許朝朝不上樓

太常引

長安三唱曉雞聲
誰不被利名驚
攬鏡照星星都老
却當年後生
山林蒼翠江湖烟景
歸去沒人爭
休望濯塵纓
幾時得滄浪水清

二

衲衣藤杖是吾緣
好歸去舊林泉
富貴任爭先
總不較諸公着鞭
鴈飛汾陽鶴歸華表
人事又千年
滄海變桑田
誰知有壺中洞天

三

青山憔悴瑣寒雲
站路上最傷神
破帽鬢沾塵
更誰是陽關故人
頽波世道浮雲交態
一日一番新

無地覓松筠看草青紅闢芳春

四

桃花流水鱖魚肥青簑笠綠蓑衣風雨不須歸管
甚做人間是非兩肩雲衲一枝筇扶盡日忘機之
子欲何為快去來山猿怪遲

五魯仲連

當時六國怯強秦使群策日紛紛談笑却三軍筭
自古誰如此君一心中忠義滿懷冰雪功就便抽身
富貴若浮雲本是箇江湖散人

六武侯

至人視有一如無見義處便相扶三顧出茅廬莫
不是先生有圖拯危當世覺民斯道佩玉已心枯
遺恨失吞吳真箇是男兒丈夫

秦樓

杯休側為君送別城南陌城南陌茸茸芳草萬家
春色陽關一曲愁腸結吟鞭斜裊黃昏月長安古
道洛陽遊客

二

斜陽暮西風落葉關山路歸鴻巢鷺笑人來去我
歌一曲君聽取人生聚散如今古如今古湘江秋
水渭川春樹

三

調羹手殘枝莫折離亭柳年年春盡為誰消瘦海
棠過雨愁紅皺行人駐馬空搔首空搔首秦樓花
月鳳城歌酒

踏莎行

白日無停青山有暮功名兩字將人悞褊懷先着

酒澆開放心又被書收住一味閑情十分幽趣夢
哦芳草池塘句東風吹徹滿城花無人曾見春來
處

二

碧水東流白雲西去旌旗捲盡西山雨淡烟寒露
月黃昏傷懷又似別來處雙眼增明青山如故故
人恠我來何暮征鼙聲震五更風夢魂驚散無蹤
緒

訴衷情

山河縈帶九州橫深谷幾為陵千年萬年興廢花
月洛陽城圖富貴論功名我無能一壺春酒數首
新詩實訴衷情

謁金門

春寒薄睡起宿醒生惡枕上家山都夢却東風吹
月落留客定知西閣有酒與誰同酌別手臨岐曾
記握君心真可託

二

醪雖薄再四勸君無惡杯到面前須飲却鶯啼花

未落束置功名高閣兩日三朝留酌綠柳來年無
可握春情憑底託

好事近

桃李盡飄零風雨更休懷惡細把牡丹遮護怕因
循吹落平蕪望斷更青山樓外數峯削野鳥不知
歸處把行雲隨着

二

酒醒夢回時小鼎串烟初滅留得瘦梅踈竹弄窓
間風月起來幽緒轉清幽幽處更難說一曲竹枝

歌罷滿宵懷冰雪

清平樂

月明風勁花弄牕間影一夜玉壺秋水冷梧葉乍凋金井世間日月如梭人生會少離多籬畔黃花開盡相逢不醉如何

二

夜來霜重簾外寒風動橫笛樓頭才一弄驚破綠窓幽夢起來情緒如何開門月色猶多照我如常如舊更誰能似姮娥

三

漁舟橫渡雲淡西山暮岸草汀花誰作主狼籍一江秋雨隨身鷗鷺蓑衣斜風細雨休歸自任飛來飛去伴他鷗鷺忘機

四

彩雲盤結何處歌聲噎歌罷彩雲歸絳闕棹下堦前明月月華千古分明照人一似無情不道天涯離客夢回愁對三更

卜筮子

曉角纔初弄驚覺幽人夢珠壓花稍的的圓春露
昨宵重小鼎香浮動閑把新詩誦坐客同嘗碧月
團擘破雙飛鳳

浣溪沙

桃李無言一徑深客愁春恨莫相尋看花酌酒且
開襟白雪浩歌真快意朱絃未絕有知音月明千
里故人心

朝中惜贈章仲一

衣冠零落暮春花飄捲滿天涯好把中原麟鳳網
來祥瑞皇家白雲丹嶂清泉綠樹幾換年華認取
隨時達節莫教繫定匏瓜

桃花曲

一川芳景一壺春酒一襟幽緒今朝好春色又無
風無雨水滿清溪花滿樹有閑鷗伴人來去行雲
望逾遠更青山無數

二

青山千里滄波千里白雲千里行程問行客更無
窮山水青史功名都半紙念劉郎鬢先如此桃源

覓無路對溪花紅紫

三

茸茸芳草漫漫長路忽忽行李佳人在何許
眇雲山千里莫惜千金沽一醉道劉郎不宜憔悴春歸
寂寞語恨桃花流水

點絳脣

十載風霜玉關紫塞都遊遍驛途方遠夜雨留孤
館燈火青燐莫把吳鉤看歌聲軟酒斟宜淺三盞
清愁散

二

古寺蕭條十年再到經行路舊題新句總是關心
處睡起西軒轉覺添幽趣斜陽暮淡烟疎雨濕遍
山前樹

三

客夢初驚雪晴風冷千山曉塞烟沙草又上郵亭
道石室蘿龕為我君應掃何時到放懷吟嘯相伴
山間老

四

寂寂朱簾鳳樓人去簫聲住斷腸詩句彩筆無題
處花褪殘紅綠滿西城樹衡臯暮客愁何許梅子
黃時雨

五

天上春來滿前芳草迷歸路楚山湘浦朝暮誰雲
兩風吹初聽認是吹簫侶劉郎去碧桃千樹世外
無尋處

六梨花

立盡黃昏鞦韆塵不到凌波處雪香凝樹懶作陽臺

兩一水相懸脉脉難為語情何許向人如訴寂寞
臨江渚

七梅

策杖尋芳小溪深雪前村路暗香時度更在清幽
處一見冰容便有西湖趣題新句句成梅許折得
南枝去

八

恰破黃昏一彎新月稍稍共玉溪流時有香浮
動別後清風馥郁添多種如相送未忘玳重已入

幽人夢

桃源憶故人

桃花亂落如紅雨
閃下西城碧樹
寂寞瑣窓朱戶
最是春深處
一樽酒盡
青山暮樓外輕雲猶度遠
水悠悠不住流得年光去

藏春集卷之五

藏春集卷之六

中書叅知政事魯國文定公左山商挺孟卿類蒙
中順大夫浙江處州府知府瀛海馬偉廷考校正

附錄

拜光祿大夫太保叅領中書省事制

長生天氣力裏

皇帝聖旨咨爾劉秉忠氣剛以直學富而文雖晦
迹於空門每潛心於聖道朕居藩邸卿實宿僚側
聞高誼餘二十年出從遐方幾數萬里迨予嗣服

須汝計安不先正名何以壓衆宜從師位兼總政
機可特授光祿大夫太保參領中書省事卿其勉
輔朕躬率先乃屬察朝夕之勤惰審議論之是非
凡有施為並聽裁決佇觀成績別示寵章准此
中統五年八月 日

贈儀同三司太傅謚文貞制

長生天氣力裏

大福廕護助裏

皇帝聖旨臣以忠孝而事上貴輸獻納之誠上以

禮義而遇臣思篤始終之愛視死之日猶生之年
故光祿大夫太保劉秉忠學窺天人識貫今古邃
冲而有守安靜而無華昔侍潛藩稔聞高論適當
三接之際懇上萬言之書蓋將舉天下而措諸安
以戒為人主者果於殺朕嗣服而伊始卿盡力以
居多蓋得卿寔契於朕心而獨朕悉知於卿意事
皆有驗人匪他求周旋三十年不避其難剴切數
百奏各中其理共成庶政方圖任於舊人誰謂昊
天不憖遺於一老興言及此何日忘之載惟台輔

之尊廢有泉局之賁是用錫之綸命峻一品之華階
襚以衾衣躡三槐之正位復加顯號允答殊勳惟爾
英靈識予哀寵可贈儀同三司太傅謚文貞准此
至元十二年正月 日

元史列傳

劉秉忠字仲晦初名侃因從釋氏又名子聰拜官
後始更今名其先瑞州人也世仕遼為官族曾大
父仕金為邢州節度副使因家焉故自大父澤而
下遂為邢人庚辰歲木華黎取邢州立都元帥府

以其父潤為都統事定改署州錄事歷鉅鹿內丘
兩縣提領所至皆有惠愛秉忠生而風骨秀異志
氣英爽不羈八歲入學日誦數百言年十三為質
子於帥府十七為邢臺節度使府令史以養其親
居常鬱鬱不樂一日投筆嘆曰吾家奕世衣冠乃
汨沒為刀筆吏乎丈夫不遇於世當隱居以求志
耳即棄去隱武安山中久之天寧虛照禪師遣徒
招致為僧以其能文詞使掌書記後遊雲中留居
南堂寺世祖在潛邸海雲禪師被召過雲中聞其

博學多材藝邀與俱行既入見應對稱旨屢承顧問秉忠於書無所不讀尤邃於易及邵氏經世書至於天文地理律曆三式六壬遁甲之屬無不精通論天下事如指諸掌世祖大愛之海雲南還秉忠遂留藩邸後數歲奔父喪賜金百兩為葬具仍遣使送至邢州服除復被召奉旨還和林上書數千百言其略曰典章禮樂法度三綱五常之教備於堯舜三王因之五霸敗之漢興以來至于五代一千三百餘年由此道者漢文景光武唐太宗玄

宗五君而玄宗不無疵也然治亂之道係乎天而由乎人天生成吉思皇帝起一旅降諸國不數年而取天下勤勞憂苦遺大寶於子孫庶傳萬祀永保無疆之福愚聞之曰以馬上取天下不可以馬上治昔武王兄也周公弟也周公思天下善事夜以繼日每得一事坐以待旦以匡周室以保周天下八百餘年周公之力也君上兄也大王弟也思周公之故事而行之在乎今日千載一時不可失也君之所任在內莫大乎相相以領百官化萬民

在外莫大乎將將以統三軍安四域內外相濟國之急務必先之也然天下之大非一人之可及萬事之細非一心之可察當擇開國功臣之子孫分為京府州郡監守督責舊官以遵王法仍差按察官守治者升否者黜天下不勞力而定也天下戶過百萬自忽都那演斷事之後差徭甚大加以軍馬調發使臣煩擾官吏乞取民不能當是以逃竄宜比舊減半或三分去一就見在之民以定差稅招逃者復業再行定奪官無定次清潔者無以遷

汙濫者無以降可比附古例定百官爵祿儀仗使家足身貴有犯於民設條定罪威福者君之權奉命者臣之職今百官自行威福進退生殺惟意之從宜從禁治天下之民未聞教化見在囚人宜從赦免明施教令使之知畏則犯者自少也教令既設則不宜繁因大朝舊例增益民間所宜設者十數條足矣教令既施罪不至死者皆提察然後決犯死刑者覆奏然後聽斷不致刑及無辜天子以天下為家兆民為子國不足取於民民不足取於

國相須如魚水有國家者置府庫設倉廩亦為助
民民有身者營產業闢田野亦為資國用也今宜
打筭官民所欠債負若實為應當差發所借宜依
合罕皇帝聖旨一本一利官司歸還凡賠償無名
虛契所負及還過元本者並行赦免納糧就遠倉
有一廢十者宜從近倉以輸為便當驛路州城飲
食祇待偏重宜計所費以準差發關市津梁正稅
十五分取一宜從舊制禁橫取減稅法以利百姓
倉庫加耗甚重宜令權量度均為一法使錙銖圭

撮尺寸皆平以存信去詐珍貝金銀之所出淘沙
鍊石實不易為一旦以纏絲縷飾皮革塗木石粧
噐仗取一時之華麗廢為塵而無濟甚可惜也宜
從禁治除帝胄功臣大官以下章服有制外無職
之人不得僭越今地廣民微賦歛繁重民不聊生
何力耕耨以厚產業宜差勸農官一員率天下百
姓務農桑營產業實國之大益古者庠序學校未
嘗廢今郡縣雖有學並非官置宜從舊制修建三
學設教授開選擇才以經義為上詞賦論策次之

兼科舉之設已奉合罕皇帝聖旨因而言之易行也開設學校宜擇開國功臣子孫受教選達才任用之天下莫大於朝省親民莫近於縣宰雖朝省有法縣宰宜擇縣宰正民自安矣關西河南地廣土沃以軍馬之所出入治而未豐宜設官招撫不數年民歸土闢以資軍馬之用實國之大事移刺中丞拘權鹽鐵諸產商賈酒醋貨殖諸事以定宣課雖使從實恢辦不足亦取於民抱允不辦已不為輕與魯合蠻奏請於舊額加倍權之往往科取

民間科權並行民無所措手足宜從舊例辦權更或減輕罷繁碎止科徵無從獻利之徒削民害國鰥寡孤獨廢疾者宜設孤老院給衣糧以為養使臣到州郡宜設館不得於官衙民家安下孔子為百王師立萬世法今廟堂雖廢存者尚多宜令州郡祭祀釋奠如舊儀近代禮樂器具靡散宜令刷會徵太常舊人教引後學使器備人存漸以修之實太平之基王道之本今天下廣遠雖成吉思皇帝威福之致亦天地神明所祐也宜訪名儒循舊

禮尊祭上下神祇和天地之氣順時序之行使神
享民依德極於幽明天下賴一人之慶見行遼曆
日月交食頗差聞司天臺改成新曆未見施行宜
因新君即位頒曆改元令京府州郡置吏漏使民
知時國滅史存古之常道宜撰脩金史令一代君
臣事業不墜於後世甚有勵也國家廣大如天萬
中取一以養天下名士宿儒之無營運產業者使
不致困窮或有營運產業者會前聖旨種養應輸
差稅其餘大小雜泛並行蠲免使自給養實國家

養才勵人之大也明君用人如大匠用材隨其巨
細長短以施規矩繩墨孔子曰君子不可小知而
可大受小人不可大受而可小知蓋君子所存者
大不能盡小人之事或有一短小人所拘者狹不
能同君子之量或有一長盡其才而用之成功之
道也君子不以言廢人不以人廢言大開言路所
以成天下安兆民也天地之大日月之明而或有
所蔽且蔽天之明者雲霧也蔽人之明者私欲佞
說也常人有之蔽一心也人君有之蔽天下也常

選左右諫臣使諷諭於未形付畫於至密也君子之心一於理義懷於忠良小人之心一於利欲懷於讒佞君子得位有容於小人小人得勢必排於君子明君在上不可不辨也孔子曰遠佞人又曰惡利口之覆邦家者此之謂也今言利者衆非圖以利國害民實欲殘民而自利也宜將國中人民必用場冶付各路課稅所以定權辦其餘言利者並行罷去古者明王不寶遠物所寶惟賢如使賢者在位能者在職此皆一人之睿知賢王之輔成

也古者治世均民產業自廢井田為阡陌後世因之不能復今窮乏者益損富盛者增加宜禁行利之人勿恃官勢居官在位者勿侵民利商賈與民和好交易不生擅奪欺罔之害真國家之利也笞箠之制宜會古酌今均為一法使無敢過越禁私置牢獄淫民無辜鞭背之刑宜禁治以彰愛生之德立朝省以統百官分有司以御衆事以至京府州郡親民之職無不備紀綱正於上法度行於下是故天下不勞而治也今新君即位之後可立朝

省以為政本其餘百官不在員多惟在得人焉耳
世祖嘉納焉又言邢州舊萬餘戶兵興以來不滿
數百凋壞日甚得良牧守如真定張耕洺水劉肅
者治之猶可完復朝廷即以耕為邢州安撫使肅
為副使由是流民復業升邢為順德府癸丑從世
祖征大理明年征雲南每贊以天地之好生王者
之神武不殺故克城之日不妄戮一人己未從伐
宋復以雲南所言力贊於上所至全活不可勝計
中統元年世祖即位問以治天下之大經養民之

良法秉忠采祖宗舊典參以古制之宜於今者條
列以聞於是下詔建元紀歲立中書省宣撫司朝
廷舊臣山林遺逸之士咸見錄用文物粲然一新
秉忠雖居左右而猶不改舊服時人稱之為總書
記至元元年翰林學士承旨王鶚奏言秉忠久侍
藩邸積有歲年參帷幄之密謀定社稷之大計忠
勤勞績宜被褒崇聖明御極萬物惟新而秉忠猶
仍其野服散號深所未安宜正其衣冠崇以顯秩
帝覽奏即日拜光祿大夫位太保參預中書省事

詔以翰林侍讀學士竇默之女妻之賜第奉先坊
且以少府宮籍監戶給之秉忠既受命以天下為
已任事無巨細凡有關於國家大體者知無不言
言無不聽帝寵任愈隆燕閑顧問輒推薦人物可
備器使者凡所甄拔後悉為名臣初帝命秉忠相
地於桓州東灤水北建城郭于龍岡三年而畢名
曰開平繼升為上都而以燕為中都四年又命秉
忠築中都城始建宗廟宮室八年奏建國號曰大
元而以中都為大都他如頒章服舉朝儀給俸祿

定官制皆自秉忠發之為一代成憲十一年扈從
至上都其地有南屏山嘗築精舍居之秋八月秉
忠無疾端坐而卒年五十九帝聞驚悼謂群臣曰
秉忠事朕三十餘年小心慎密不避艱險言無隱
情其陰陽術數之精占事知來若合符契惟朕知
之他人莫得聞也出內府錢具棺斂遣禮部侍郎
趙秉溫護其喪還葬大都十二年贈太傅封趙國
公謚文貞成宗時贈太師謚文正仁宗時又進封
常山王秉忠自幼好學至老不衰雖位極人臣而

齋居蔬食終日澹然不異平昔自號藏春散人每以吟詠自適其詩蕭散閑淡類其為人有文集十卷無子以弟秉恕子蘭璋後

行狀

故光祿大夫太保贈太傅儀同三司謚文貞

劉公行狀

資政大夫中書左丞張文謙奉勅撰

公諱侃更名秉忠字仲晦自號曰藏春其先仕遼為當時大族世居瑞州之劉李村一門之內居顯

列者甚衆金初公之曾祖襲世業累遷邢州節度副使丁母憂復還瑞州留一子於邢名澤即公之祖也因而家焉為人倜儻有大志鄉里甚畏重之娶邢臺張氏女生一子名潤即公之父也通音律慈祥長者與物無忤庚辰歲天兵南下太師國王經略河朔邢遂舉以降留官鎮守以草昧之際聽便宜行事遂立都元帥府衆推潤為副都統尋陞都統事定之後署本郡錄事為政寬簡不立威嚴凡民有鬪訟者既伏其罪則必以善言教戒而遣

之終不忍鞭朴也時西山諸堡寨未附寇盜充斥錄事公時或暮夜醉歸雖兇惡輩必相與扶送至家而去累任鉅鹿內丘提領又以寬仁得衆心年甫六旬村居不仕生二子長即太保公也次日秉恕公生而秀異羊骨不凡在嬉戲中便為群兒所推長或舉之為帥或拜之為師居然受之不疑隨即教令揮斥之性剛而有斷非理不屈於人母馬氏嚴整有法度凡起居飲食必責公以正理不為姑息之愛八歲入學誦書為諸生稱首年十三以

父為錄事為質於元帥府元帥一見即云此兒骨相非常他日必貴命僚佐教之文藝不使列質子班置之幕司公遂立志為學詩文字畫與日俱進同輩生莫得窺其涯際也年十七節使趙公引置幕下甚愛重之時方在貧乏中一介不以取諸人好賢樂善而居常裕如也丙申歲丁母憂毀瘠骨立疏食水飲哀思無窮恒衣一綿裘晝夜不解帶者三年見之者無不感歎也戊戌春遂決意逃避世事遜居於武安之清化遷滴水澗苦形骸甘澹

泊宅心物外與全真道者居復欲西遊關陝天寧
虛照老師聞之愛其才而不能舍遣弟子輩詣清
化就為披剃與之俱來秋七月大蝗居人之乏食
者十八九虛照老因妹婿之請就熟雲中挈公同
往己亥秋虛照老還邢公因留住南堂講習天文
陰陽三式諸書會海雲大士至一見奇其才時
上在藩邸遣使召海雲老北上因携公偕行既至
見洒落不凡及通陰陽天文之書甚喜海雲老南
歸公遂見留自是禮遇漸隆因其

顧問之際遂闢用人之路暇中則讀書窮易講明
聖人學丙午冬其父錄事公之哀聞至

上聞之召入溫言慰諭丁未春賻以黃金百兩遣
使送還六月至邢州依通禮行素志冬十月葬祖
父母及父母于邢臺之賈村戊申冬十二月
上遣使召公己酉春至

王府庚戌夏上萬言策所陳數十餘條皆尊
主庇民之事首言正朝廷振紀綱選相任賢安民
固本執牘以奏

上皆嘉納之甲寅秋

上征雲南以神武不殺之心所向克捷筭無遺策其所全活者不可勝數公夙夜勤勞以副

上意未嘗少怠己未秋六軍渡江公潛贊神機孜孜匪懈一如雲南之行庚申春

上正位宸極召公命之曰凡天下之大經養民之良法卿其議擬以奏公即上採

祖宗舊典參以古制之宜於今者條列以聞深稱上意

詔下之日綱舉目張一時人材咸見錄用文物粲然一新先是

上命有司擇上都南山之勝地營建庵舍而居公馬公號其山曰南屏中統五年秋八月改元至元

翰林學士承旨王鶚奏公當正衣冠且曰鶚嘗勸馬未之見許乞

賜特旨以遂衆望

詔從之以光祿太保叅領中書省事更名秉忠公既大拜報國之心益切

上命公議建

國號定都邑頒章服舉朝儀事無巨細有關時政之得失者公知無不言七年庚午

上從諸臣之請遣禮部侍郎趙秉溫禮擇翰林侍講學士竇默之次女以配公竇氏賢而有文御下以寬車駕歲時行幸兩都公必隨之十一年夏居於上都南屏之精舍秋八月壬戌夜謂侍者皆退長歌至鷄鳴乃止質明侍者入即端坐而薨如假寐然顏色累日不變識者謂公坐脫也享年五十

有九猶子蘭璋嗣焉

上遣禮部侍郎知侍儀司事兼秘書少監趙秉溫擇以冬十月壬申葬於大都之西南凡所營葬之資一出於

內帑十二年春正月

詔贈太傅儀同三司文貞公

帝曰朕惟秉忠始終逾三十年隨行跋涉雖祁寒暑雨未嘗有倦意而又言無隱避一皆出於忠誠其天文卜筮之精朕未嘗求於他人也此朕之所

自知人皆莫得與聞今其亡也了無遺恨特命學士王磐撰碑銘公博學無方明通而溥其勲業之著見於世昭昭然不可掩也論藝業則字畫出魯公筆法草書二王三昧發邵氏皇極之奧旨改前代已差之曆法得琴阮徽外之遺音至天文卜筮筭數皆有成書無一不極其至詩章樂府又皆膾炙人口公之弟秉恕累任禮部侍郎順德安撫使彰德懷孟淄萊順天路總管其母張氏賦性勤儉篤於謹嚴公平生之嘉言善行播在天下者甚多

神道碑銘

姑錄已之所知者以道出處之大槩云至元乙亥春正月張文謙拭淚書

故光祿大夫太保贈太傅儀同三司文貞劉公神道碑銘并序

翰林學士嘉議大夫知制誥兼修國史王磐奉勅撰

昭文館大學士正議大夫姚樞奉勅書
國信使所叅議官高翹篆額

耕莘非求進之地而伊尹阿衡釣渭非巧宦之途
而太公同軌漢張良志從赤松而高祖得之
成帝業唐李泌幼好仙術而肅宗用之以佐定中
興蓋天下之士惟自重者可與有為而輕進者必
非令器是以古之明王取士不以悅媚易親者為
可佳而以閑遠高潔難致者為可貴
聖天子之用太保劉公其審是道歟公以高潔之
資慕空寂之教輕富貴如浮雲等功名於夢幻曷
嘗有一毫榮利之念動於心乎

聖天子邂逅一見即挽而留之待以心腹契如魚
水深謀密畫雖耆宿貴近不得與聞者悉與公叅
決焉此其精誠胥會志意交孚與夫渭濱之同載
商邑之阿衡蓋異世而同符矣公諱秉忠字仲晦
瑞州劉李村人先世仕遼多顯貴金初曾大父嘗
任邢州節度副使秩滿身還鄉里留其家於邢故
自公大父以下遂為邢人焉大父諱澤資性倜儻
為鄉閭所重父諱潤仕本朝歷邢州錄事鉅鹿內
丘兩縣提領俱有惠愛公風骨秀異志氣英爽不

羈家貧年十七為邢臺節使府令史以養其親幹
敏條潔諸老吏咸服其能一日因案牘事有不愜
意者投筆嘆曰吾家奕世衣冠今吾乃汨沒為刀
筆吏乎丈夫不得志於世間當求出世間事耳即
棄去隱於武安山岩谷間草衣木食以求所志天
寧寺虛照禪師聞之遣其徒招致與披剃為僧仍
以公知經書工翰墨命掌書記後遊雲中住南堂
寺值海雲禪師被
召北覲過雲中聞公博學多藝能求相見既見約

公俱行公不可海雲固要之不得已遂行既至謁
今上於潛邸一見應對稱

旨自是屢承

顧問及海雲南還公遂見留居數年錄事公卒訃
音至公懇求奔喪

上賜之黃金百兩仍遣使送邢州公持服營葬事
起墳於賈村塋其祖父母父母服闋被

召復還和林公獻書陳時事所宜者數十條凡萬
餘言率皆尊

主庇民之事

上嘉納之甲寅歲從

上征雲南己未歲從

上代宋由楊羅渡濟江圍鄂州

上神武英斷每臨戰陣前無堅敵而中心仁愛公常贊之以天地好生為德佛氏以慈悲濟物為心方便救護所全活者不可勝計庚申歲春

上正位宸極創定朝儀立官制改元建號一切所當施設時物之宜皆公所草定中統五年秋八月

改至元元年翰林學士承旨王鶚

奏言書記劉秉忠效忠藩邸積有歲年參幃幄之密謀定社稷之大計忠勤勞績宜被褒榮今

聖明御極萬物惟新秉忠猶以野服散號蕭條閑寂守其初心深所未安宜與正其衣冠崇以顯秩實遂衆望

上覽奏欣然嘉納即日命有司備禮冊授公光祿大夫位太保參領中書事選聘侍講學士竇默次女為夫人賜第於奉先坊給少府宮籍監戶人口

甚衆公齋居蔬食終日澹然與平昔略不少異至元十一年扈從至上都居南屏之精舍秋八月壬戌之夜儼然端坐無疾而薨享年五十有九訃聞上嗟悼不已謂群臣曰秉忠事朕三十餘年小心慎密不避險難事有可否言無隱情又其陰陽術數占事知來若合符契惟朕知之他人莫得與聞也遣禮部侍郎趙秉溫護其喪還大都以冬十月壬申葬大都西南二十里崇福鄉之原棺斂營葬一切所須皆出內帑十二年春正月

詔贈太傅儀同三司下太常議謚曰文貞仍命翰林學士王磐定撰碑石文字臣磐欽惟國家列聖相承咸以武功戡定禍亂龍韜豹略鷹揚虎視豐功偉績之臣其當紀名汗簡畫像凌烟者不為不多若夫輔佐

聖天子開文明之治立太平之基光守成之業者實惟太傅劉公為稱首

聖天子方在潛邸士之所以涉遠道冒風霜而至者徃徃有所陳訴祈請干慕進用惟公獨無所求

閑燕之際每承

顧問輒推薦南州人物可備器使者宜見錄用由是弓旌之所招蒲輪之所趨者儒碩德竒才異能之士茅拔茹連至無虛月逮今三十年間揚歷朝省斑布郡縣贊維新之化成治安之功者皆公平昔推薦之餘也其識度之宏遠推此一節而論亦可見其髣髴矣又自幼好學至老不衰通曉音律精筭數

仰觀占候六壬遁甲易經象數邵氏皇極之書靡不周知初丁太夫人憂毀瘠骨立衣一幣裘三歲不易及錄事公卒雖身從天竺之教而服食貶損容貌哀戚與循禮典而執通喪者蓋無少異也晚娶無子以猶子蘭璋為嗣弟秉恕今為順天路總管臣磐謹按中書左丞張文謙所作行狀次第其行事實而系以銘辭銘曰

大元五葉

聖運隆昌

爰有異人

出佐時康

不坐官府

不趨朝行

褐衣蔬食

禪寂徜徉

謀謨帷幄

罄竭忠良

指陳成敗

開闔陰陽

淵慮規畫 鬼神莫量 扶日上天 照臨萬方
萬方仰德 百靈效祥 庭陳玉帛 路走梯航
朝儀整肅 濟濟踴躍 群賢來集 庶政允臧
大綱一舉 衆目畢張 治定功成
聖眷彌彰 崇資峻秩 師表侯王 肇造
皇家 元勳是當 良平佐漢 房杜興唐
公不自多 愈隆謙光 見善必舉 有能必揚
陸行滯阻 與為橋梁 川濟艱危 與為帆槳
寒而求衣 燠之裘裳 饑而求食 飫之腴肪

門庭桃李 爛熳芬芳 人感公德 銘刻肝腸
公施於人 過即遺忘 公之仁賢 宜享遐年
胡為一朝 蟬蛻而仙 燕都南原 盧溝北暎
佳城鬱鬱 有墳巋然 地錮重泉 松栢參天
石爛松枯 芳名永全

墓誌銘

故光祿大夫太保劉公墓誌

翰林侍講學士少中大夫知制誥同修國史
徒單公履撰

公姓劉氏諱侃更名秉忠仲晦其字也號曰藏春
世居瑞州之劉李村其先仕遼多貴顯經亂譜謀
散亡不能考據獨公之曾祖金初以世族累遷邢
州節度副使秩滿愛其風土因而家焉繼丁母憂
還瑞州留一子二女長適邢臺李氏次適陳氏子
名澤即公之祖父也為人倜儻有志節鄉里多愛
重之娶張氏生男名潤公之父也幼通音律性慈
祥居家接物之際終日無忤色號稱長者庚辰歲
天兵南下邢遂舉郡降大師國王喜之聽立都元

帥府衆推公為副都統尋陞都統事稍定改署本
郡錄事為政寬而不苛民有爭訟者必以理論之
人皆服其忠恕相讓而罷蓋庶幾古之不忍欺者
時草昧之際未有定制州長數易無常每易則各
樹親黨以代其先至者公獨不為所忌累任鉅鹿
內丘提領所至皆有遺愛年甫六旬以老得告二
子曰秉忠即公也次曰秉恕公天資穎悟卓犖不
凡兒時與群兒戲皆推以為長發蹤指使莫不奔
走服事無有違者識者竒之母馬氏治家有法簡

而不嚴教子踵三遷之訓尤不為姑息鄉人稱賢
馬公八歲入學日誦數百言甫十二為質於元帥
府元帥一見謂同僚曰此兒甚貴他日不可量也
命師教以文藝不使隸質子班公遂致力於學道
藝日進同輩莫能及年十七節使趙公以為才引
置幕下丙申歲丁母憂毀瘠骨立恒衣一綿裘晝
夜不解帶三年人以為難能公優為之可謂盡子
道矣戊戌春公忽有所感謂人曰人生有限世事
寧有極耶吾其息乎乃遁居武安之清化作文數

篇以寓意又遷瀟水澗雖疏食飲水裕如也天寧
虛照老師聞之奇其行高而節苦遣弟子顏仲復
輩以禮諭公遂備弟子禮是歲秋大蝗師遂挈公
就孰雲中己亥歲大熟師乃還邢公因留住南堂
講習天文陰陽三式諸書時海雲大士赴
上召一見即携公偕行既至

上以公博學多能遂留之自是禮日隆暇中讀四
書窮易道講明聖人心學之妙無不該貫丙午冬
其父錄事公卒哀至公乞奔喪

上許之贈以黃金百兩既至邢依通禮服斬衰不以出世故而虧世法也父子之倫正矣明年冬十月葬祖及父於邢臺之賈村禮也戊申十二月上遣使召公還乃上策萬餘言正朝廷振紀綱選相任賢安民回本若是者數十條

上曰誠如汝言天下可不勞而治公曰臣所言不敢不忠惟

聖上從之與否耳既而復言於

上曰今天下困弊邢為尤甚郡數乞官以治儻從

其請邢民受賜多矣

上遣本朝宿望之臣同劉肅才卿李簡子敬行專以存恤為務舊邢之版籍戶不過二千月餘流民歸者二萬邢遂大治甲寅秋從

上征雲南首以神武不殺為請以故所全活者甚衆公決機制勝多與上合雲南之平此固

廟謨英識筭無遺策亦公贊成之力也已未秋六軍渡江以雲南之所請者復於

上民皆壺箠以迎莫不有僕后來蘇之望以全

聖上好生惡殺之德者類如此庚申春

上正位宸極命公議立中書省分一路宣撫司內而藩邸舊臣外而草茅遺逸皆得進用故官無曠員時無滯才於是除煩苛定官制頒俸秩輕徭薄賦制禮作樂聲明文物粲然一新號稱盛時焉五年八月改中統為至元

詔公以光祿大夫進位太保叅領中書省事更今名公既大拜以天下之重為已任以身徇國知無不為奏建國號定都邑頒章服立朝儀事無巨細

有關於 國家大體者枚舉而縷陳之無有遺者十一年夏齋居於上都南屏之靜舍秋八月壬戌夜謂侍者曰汝輩皆退不召且勿來也長歌至雞鳴乃止遲明侍者入見其端坐不動即之乃瞑目輟息始知其已薨矣莫不大駭蓋其平日洗心無累故其歸也安所以長歌者其猶古之所謂翫世者乎享年五十有九猶子蘭璋為嗣

上遣禮部侍郎知侍儀司事兼秘書少監趙秉溫擇以十月晦日葬於大都西南之崇福原凡所營葬

之資一出於特恩也弟秉恕累任禮部侍郎順德安撫使彰德懷孟淄萊順天路總管皆著能聲其母張氏性勤儉內助謹嚴視公猶所生公之夫人竇氏乃今翰林侍講學士竇默之女七年庚午詔遣禮部侍郎趙秉溫禮擇而配者焉夫人賢而且文御僕妾有恩內外宜之公之勤勞卓然著於世者固不可掩也論藝業字畫楷書雖多惟以魯公筆法為正草書又獨取二王以為專門之學餘則不暇論也其用心之正可見矣探邵氏皇極之

與旨正前代積差之曆法得琴阮徽外之遺音槩乎天文星緯卜筮算數皆有成書詩章樂府又皆膾炙人口其多能又如此至於嘉言正論達之於啓沃之際者未能盡錄俟後之紀于神道云銘曰
繫公之初稟元精氣奪玄化生而靈始從大覺正法乘萬緣一掃鴻毛輕超然遠引拋塵纓成已成物乃自成聖哲有訓垂丁寧晨門荷篠真狂生絕世而往恐未能歸來讀書志益凝旁達技數搜玄冥學通而晦寧與徵政可絜世躋昇平天開地闢

旭日升聲教溥洽昭

皇明提封所暨窮四溟面內不啻葵心傾公時佐
命居保衡斟酌時措恢邦經天官上宰董六卿百
師庶尹咸師承一時憲度明章程叔孫綿絕鏘珮
珩宮懸九奏何鏗鉤曠時墜典今儀刑鋪張若是
誰倚憑拔擢俊秀推髦英于飛振鷺來充庭謀王
斷國裨益弘事在宸慮人無稱功成不居寧智名
天聰一日音訃聆尚冀假寐聊遐征神遊不返慘
聖情始終寵賻全哀榮天不憖遺一鑑零九原可

作瞻模形麒麟有像傳丹青燕山西來瀘水縈墳
科馬鬣幽泉扃岸深為谷谷乃陵榮公不朽存吾銘

祭文

維至元十一年九月甲戌朔八日辛巳昭文館大
學士姚樞致祭于

太保劉公亡友之靈嗚呼昔在恒山我車于憇公
來惠然若交一臂

王邸再逢始見淵懿六籍四書潛心內嗜釋子之
衣孔門之嗣吾道斯文綱維不墜格

君之心匪政匪事引

君之道曰仁曰義國其丘民惟賢乃又兵則神武不殺為至輯集一書累踰萬字陳於

王前若合符契試政邢臺翁爾成治陝右河南化行尤亟雲南逆命邦人罔累漢鄂折衝兵無暴肆萬國懽心咸薦之

帝帝曰嘉哉汝其所自元勳不居孤卿無位身入靜深學窮幽遠曆數之原元會運世所以盈虛矢口坐致積養有素時行未既俄聞訃音脫然蟬蛻

不疾而終誠足以異斯焉取斯係乎前志莫不我偕身親目視及物功多鬼神報施過此以還未知所謂 天皇歸賻

母后主瘞諸相庶官半由門庇感兮孔悲潛焉出涕人世哀榮鮮克有儷六十之年不為蚤逝後莫大焉猶子以繼遺恨毫釐衆所弗置諸生在門一語不遺嗚呼哀哉我思或存公往如棄魂其來兮以承禴祭尚 饗

又

維至元十一年歲次甲戌冬十二月望日翰林侍
講學士吏部尚書博州路總管徐世隆謹以清酌
庶羞之奠致祭于

太保劉公之靈嗚呼

天興大元六十餘年王氣所鍾有開必先
聖不獨出衆賢從之聖賢相逢千載一時若若劉
公首出襄國學際天人道冠儒釋初冠章甫潛心
孔氏又學葆真復叅臨濟其藏無盡其境無涯鑿
開三室混為一家逆知天命早識

龍顏情好日密話必夜闌如魚得水如虎在山易
地諸葛彌天道安道人其形宰相其心誰其似之
黑衣惠琳數精皇極禍福能決誰其似之邵君康
節詩詠高逸方外神遊誰其似之碧雲湯休字畫
清勁筆中法具誰其似之黃山文孺扈從

王師柔服哀牢公於是時蜀之韋臯堂上出奇鄂
江飛渡公於是時晉之杜預天王既尊山人自晦
公於是時唐之李泌相宅卜宮兩都並雄公於是
時周之召公中統建元宣撫十道多舉名儒視草

其詔至元入省

命贊萬機暫決大議力辭以歸

上亦知公不屑細務止解中書仍居保傅官制未定圖具列之朝儀未肅公奏聞之方期弘化儀刑萬方天遽奪之今也則亡生平少疾遲明歌唱開戶視之掩書長往天子震悼朝臣涕洟下至行路靡不衰思國事有疑誰與稽之民歲有災誰與禳之僚友有咎誰與救之人之老成寧復見之曩過趙郡有三大士曰蕭曰劉器量包世迹混佛老心

同孔周仁兩義風欲洒九州蕭已仙蛻獨遺藏春栽培桃李徧滿君門身為師賓門多卿相榮被殊遇得獲大葬公既無憾我獨何悲第愧老謬嘗辱公知我愛文辭許我典故視事翰林持衡文部公非私舉我豈懷恩言念如舊往哭其墳南州孺子生芻一束奠章寫心老淚盈掬嗚呼哀哉尚

饗



藏春詩集卷之六終



藏春詩集後序

文章之精者為詩其作始之由關繫之重累變之
端昔人述之備矣大抵得之有二一出於才一成
於學必至天成妙悟千轉萬化而弗違理道之為
貴也元太傅劉文貞公秉忠以天挺人豪之才統
一貫萬之學出鬼入神之術空世離俗之識際遇
世祖於王邸教其收攬中夏之雄才碩學征南詔
下襄漢聿承寶位奄有四海所施甚異及蒙恩大
拜正其倫紀又為之下都邑定朝儀使綱舉目張

文物一新隱然太平氣象厥功烈哉尚論其恩遇
隆渥言聽計從類宋惠琳豐功偉蹟始終一致類
唐李泌而和順積中英華秀發雖吟風弄月之
詞適情寫景之作咄嗟戲噓之音皆清新壯麗灑
落渾脫如風如影不可窺擬而一歸于禮義豈其
才以學濟詩從禪悟道臻太極妙際真空恍惚有
無超越萬化故能無可不可無為不感歎處州守
馬侯生近公鄉慨公功名事業播傳已久而詩文
之美世或未聞乃彙而輯之刻梓廣傳俾敘諸元

翰林學士閻公復後盛心也夫人之為人貴乎立
德其次立功立言弗能兼也若公者可謂有德有
功且有言也歟然公生平謀謨之辭治安之策述
事載道垂世立教之文當不止是同志君子毋視
以為公之餘事采而補之庶無遺憾也公雖世顯
于邢實吾瑞劉李村人蓋一村兩姓唐宋以來世
為婚媾如徐之朱陳耳世澤之萃于公者遠哉
大明天順五年辛巳冬十月既望河南南陽府泌
陽縣吏臨川黎近久大書

藏春詩集

後序

藏春詩集後序終

藏書印

